



UNIVERSITÄTS-
BIBLIOTHEK
PADERBORN

Praxis Meditationum S.P. Ignatii Loyolae

Diertins, Joseph

Solisbaci, 1708

Med. 9. Ejusdem Myst. punct. 3.

[urn:nbn:de:hbz:466:1-60232](https://nbn-resolving.org/urn:nbn:de:hbz:466:1-60232)

erga Christum, qui ex charitate erga nos tanta passus est, propter illa nostra peccata. De his excitemus contritionem, deinceps optemus talia pati & agere cum ipso benefaciendo illis, qui oderunt nos.

COLLOQ. Tertii modi humilitatis.
RECOLLECTIO. REPETITIO. APPLICATIO SENSUUM.

MEDITATIO IX.

De comprehensione Christi, & traductione ad Annæ domum. Matt. 26. &c.
Myst. punct. 3.

CONG. Instantem meditationem delibare, sicut ante explicatum est.

PRÆL. I. Quomodo Christus ductus sit ad Annæ domum, à Petro negatus primâ vice, a lapâ percussus, & alia, quæ in illa domo dicta & facta sunt.

PRÆL. II. Aspicerè Annæ domum, & viam ex horto ad ipsam.

PRÆL. III. Petere gratiam cognoscendi & imitandi exempla virtutum, quæ Christus ibi exhibuit: nominatim in perferendis opprobriis & injuriis, & in humilitate.

PUNCTUM. I. PERSONÆ. MEM. Aspiciamus Christum ad Annæ domum trahi, derelictum à Discipulis, Petro sequente à longè.

INTEL. Perpendamus Christum sic derelictum, fuisse

fuisse quodammodo descriptum Ps. 87. ubi legitur: *Longè fecisti notos meos à me.* REFL. Nos exemplo hoc docemur, non esse fidendum hominibus quamvis multa promittentibus. *Maledictus homo, qui confidit in homine, & ponit carnem brachium suum.* Jer. 17.

VOL. Fiduciam totam nostram collocemus in Deo: *Bonum est considerare in Domino, quàm considerare in homine. Bonum est sperare in Domino, quàm sperare in Principibus.* Ps. 117.

PUNCTUM, II. VERBA. MEM. Respondit ei Jesus: *si malè locutus sum, testimonium perhibe de malo: si autem benè, quid me cedis?* Joan. 18.

INTEL. Hæc dixit Jesus Ministro, qui reprehenderat Jesum; *dicens: sic respondes Pontifici?* Joan. 18. Diluit igitur accusationem Christus, ne alii credant ipsum irreverenter fuisse locutum Pontifici. REFL. Docemur interdum respondendum esse injuriis; sed mansuetè; ne scilicet silentium aliis sit causa scandali.

VOL. Accusemus nos ipsos, quod sæpè respondeamus, quando respondendum non est; & si respondendum est, quod id faciamus nimis multis, & acerbis verbis. *Respondebo exprobrantibus mihi verbum,* inquit David Ps. 118. hoc est, paucis, non contendendo multis. Applicemus nobis quoque illud Ps. 101. quamvis non in eodem planè sensu: *Respondit ei in viâ virtutis sue.* Et Exemplo Christi, sic respondeamus, ut maneamus in viâ virtutis, patientiæ scilicet, mansuetudinis, benignitatis. &c.

PUN-

PUNCTUM. III. OPERA. MEM. Petrus ad voce Ancillæ ostiariæ negavit se esse Discipulum Christi, dicens: *non sum.* Joan. 18.

INTEL. En Petrus sive Petra, & fundamentum Ecclesiæ, tam miserè labitur, & tam turpe committit peccatum, postquam dixerat: *etiamsi oportuerit me mori tecum, non te negabo.* Matth. 26.

REFL. Discamus hinc, quod non aliis tantum, sed etiam nobis ipsis non fidendum.

VOL. Humiliemus nos ipsos, diffidentes nobis, & oremus: *Miserere mei Domine, quoniam infirmus sum.* Ps. 6. *Non enim in arcu meo sperabo.* Ps. 43. hoc est, in meis viribus.

PUNCTUM. IV. QUID PATIATUR. MEM. *Unus assistens Ministrorum dedit Alapam Jesu.* Joan. 18.

INTEL. Sive percutientem, sive percussum, sive cætera consideremus; hæc injuria est, tam enormis, ut tanta inter homines excogitari non possit.

REFL. Comparemus ea, quæ nos patimur cum hac alapâ.

VOL. Compatiamur Christo, qui passus est, quod nobis debebatur. *Domine nobis confusio faciei... & patribus nostris, qui peccaverunt. Tibi autem Domino nostro Misericordia.* &c. Dan. 9.

PUNCTUM V. QUID DIVINITAS. MEM. Convertamus mentem ad Divinitatem hæc omni permittentem.

INTEL. Divinitas in horto ostenderit miraculo non uno, quomodo posset momento omnes illos

adversarios perdere : permittit tamen humanitatem tam atrociam pati. REFL. Hinc patet, quod nos quoque multa constanter debeamus pati, quamvis nonnunquam vitare illa possimus.

VOL. Confugiamus ad tertium humilitatis modum nosque Christo in hoc assimilemus.

PUNCTUM VI. QUID NOS. MEM. Intueamur Christum a lapâ illâ deformatum.

INTEL. Quandoquidem Divinitas potuerit omni momento iniquos illos perdere, constat solam charitatem erga nos peccatores causam fuisse, permissæ tam injuriosæ alapæ. REFL. Cogitemus an rationis compos sit, quem tanta charitas non movet ad reciprocam charitatem.

VOL. Pudeat nos, quod aliud cogitaverimus, vel amaverimus, quàm hunc nostrum Redemptorem. Totos nos illi immolemus in igne reciprocæ dilectionis : quæ haud dubiè deducet nos ad affectus tertii modi humilitatis.

COLLOQ. De tribus modis humilitatis.

RECOLLECTIO.

MEDI-